



## Terenga 6: Hōtaka 54 - Te rerehāngū me te rereāhua

### He Mihi

Nau mai anō ki te pūtahitanga o Manawa kai roke. Ki konei rukuhia ai ngā puna o te reo - ā-waha, ā-tuhi, ā-wetereo anō hoki, me kore noa e noho mai anō tēnei reo hei reo matua mō te hunga e ngākaunui ana ki a ia.

### Hei Mahi Whakarongo

He rōreka te reo korihi o te manu tīoriori e haere ake nei. Nō Te Tairāwhiti a Tama Waipara, e waiata ana ia i tā Hirini Melbourne waiata rongonui. Anei ngā pātai hei whakautu mā koutou:

- 1) Mā te aha e mahea ake ai ngā raru?
- 2) Ka ahatia ngā here?
- 3) He aha tētehi tohutohu kei roto?

Kia whakarongo ake tātou ki tēnei toki o te ao Māori mō te waiata, ki a Tama Waipara.

### He Whakamārama

Tirohia ngā tauria e rua e whai ake nei e kitea ai ngā whakatakotoranga rerekē o te Rerehāngū me te Rereāhua. Kei roto i te Rerehāngū, ka tohu te 'e' i te kaimahi. Kei roto i te Rereāhua, ka tohu te 'i' i te pūtake o te āhua.

1. ua (hāngū + e + kaimahi)  
I **horōia** mātou **e te ua**.
2. ua (āhua + i + pūtake)  
I **mākū** aku kaka **i te ua**.

### He Mahi Ī-papa



Whakaurua te kupu ki roto i tētehi rerenga korero.

---

---

### Hei Mahi

Tuhia he rerenga kōrero mō ia āhuatanga e whai ake nei. Ka kitea e koe te momo rerenga i ngā taiapa.

1. hau (rerehāngū)
2. āwhā (rereāhua)
3. taiāniwhaniwha (rerehāngū)
4. rā (rereāhua)

### Whakautu:

**Mahi Īpapa:** I makere i te kaitākaro te whutupōro.

**Hei Mahi:**

1. I pūhia te whare e te hau.
2. I hinga ngā whare katoa i te āwhā.
3. I huripokina ngā waka e te taiāniwhaniwha.
4. E kore te aroha e maroke i te rā.